

## Merā Nek K̄haadim

**Taurait : Yashaayaah 53:1-12**

[Ye Yashaayaah<sup>(a-s)</sup> ne Allaah taa'alā ke āne waale Maseehā ke baare me bataayā hai:]

Kaun hamaare paigāam par īmaan laayā?  
Kisne ismeñ Allaah taa'alā kī taaqat dekhī.<sup>(1)</sup>  
Wo Allaah taa'alā ke saamne ek paudhe kī tarah baḍā hogā.  
Wo sukhī zameen par ugne waalī ek jhaaḍī kī tarah hogā.  
Usmeñ aisī koī k̄hubsurtī waalī baat naheen hogī ki ham usko dekheñ.  
Aur nā hī usmeñ aisā kuch hogā ki ham usko pasañd kareñ.<sup>(2)</sup>

Us se log nafrat kareñge aur usko qubul naheen kareñge.  
Usko bahut mushkil aur takleefon kā saamnā karnā paḍegā.  
Wo aisā hogā ki log uskī taraf dekhnā bhī pasañd naheen kareñge.  
Us se log nafrat kareñge aur ham uskī izzat naheen kareñge.<sup>(3)</sup>

Lekin, wo hamaarī mushkilon ko apne upar le legā  
aur hamaare dard ko hamaare liye sahegā.  
Jab ham uskī pareshaniyon ko dekheñge  
to hameñ lagegā ki Allaah taa'alā use sazā de rahā hai.<sup>(4)</sup>

Ġalat kaam hamne kare aur zaḳḥmī wo hogā.  
Gunaah ham kareñge aur sazā usko milegī.  
Wo sazā, jisse ham acche ho gae, wo usko dī jaege.  
Uske zaḳḥmon kī wajah se hamaare zaḳḥm bhar jaeñge.<sup>(5)</sup>

Ham sab bheḍon kī tarah idhar-udhar bhaṭak rahe hoñge.  
Ham me se har koī apne-apne raaste par chalā jā rahā hogā.  
Lekin Allaah taa'alā hamaare saare gunaahon ke bojh ko unheñ de degā.<sup>(6)</sup>

Usko burī tarah se maarā jaege aur sazā dī jaege.  
Lekin wo kuch bhī naheen kahegā.  
Wo us bheḍ kī tarah hogā jisko zibaah karne ke liye le jaayā jā rahā ho.  
Wo us bheḍ kī tarah k̄haamosh rahegā ki jiske upar se baal kaṭe jā rahe hon.  
Wo apne āpko bachaane ke liye apnī zubaan naheen kholegā.<sup>(7)</sup>

Use zabardastī qaid kiyā jaege.  
Aur usko insaaf naheen milegā.  
Koī bhī uskī āne waalī pushton ke baare me baat naheen karegā.  
Kyun ki usko qatl kar diyā gayā thā.  
Usko mere logoñ ke gunaah kī sazā milegī.  
Jin gunaahgaaron ko sazā milnī chaahie thī.<sup>(8)</sup>

Wo nā hī koī gunaah karegā aur nā hī kabhī koī jhuṭ bolegā.  
Phir bhī usko bure logoñ ke beech me dafnaayā jaege.  
Aur un logoñ ke beech me jo ameer hoñge.<sup>(9)</sup>

Lekin wo Allaah taa'alā thā jisne faisla kiyā  
ki wo mushkil aur takleef sahe.  
Allaah taa'alā ne uskī zindagi ko gunaahon kī baḳḥshish ke liye qurbaanī banaayā hai.  
Lekin, wo apnī naslon ko dekhegā aur bahut lambī umr jiegā.  
Wo Allaah kī marzī ko purā karne me kaamyab ho jaege.<sup>(10)</sup>

Apnī ruh kī in takleefon ke baad  
wo zindagi kī ek roshnī dekhegā aur sukun haasil kar legā.  
Allaah taa'alā ne kahā, "Wo apne ilm kī wajah se merā  
nek k̄haadim logoñ ko mere saamne paak karegā.  
Wo logoñ ke gunaahon ko unke añdar se kheen ch legā."<sup>(11)</sup>

“Isī wajah se,” (Allaah taa’alā ne kahā), “Maiñ usko ek azeem muqaam duḡā.  
Wo apnī jeet kā ināam un logoñ ke saath baañtegā jo log pakke īmaan waale haiñ.  
Kyuñki uskī ruh ne āḡhirī dam tak takleef sahī hai.  
Aur islie bhī: Kyuñki uskī gintī gunaaḡgaaron me karī gaī.  
Is tarah se usne apne upar dusron ke gunaaḡ laad liye.  
Aur usne mujhse kahā ki gunaaḡgaaron ko maaf kar do.”<sup>(12)</sup>